

# I me giovedì a Montorio

Pàr i altri  
el giovedì l'è un giorno come tanti  
ma pàr mi el g'à altro color...  
Na olta a scola, el giovedì  
l'era el giorno dela caminada,  
in fila co la maestra in testa  
ordinadi, verso la colina...

Ancò pàr mi  
el giovedì  
el g'à un saor diverso  
l'è el giorno de cambiàr mestier  
de lassar star  
de far el professor dele buganse  
e de ciapàr la strada  
che porta ad altri alievi più gentili  
quei che no pol mancar ale lesioni  
quei che no g'à da far  
mai giustificassioni...

Ciapo el bus pien  
de studenti ignoranti  
de vecie petegole  
e de omeni aroganti...  
Fin a rivar ala casa  
dele me lessoni,  
son a Montorio e vo in preson!

Agenti, guardie, sbare  
e ciave rumorose  
longhi corridoi, gente  
che te saluda volentieri  
penombre de tristesse  
e fiori de speranza,  
eco semo tuti arivadi  
in quella stansa...

E mi conto le me storie  
e voialtri me disi le vostre,

e mi ve sento amissi  
e no so capir el parché  
i va serado qua...  
E gnanca lo domando...

Finisse la lesson  
una guardia gentile me saluda  
le butele me da un basin  
e ognuno de voialtri rientra  
a le so cele...

E mi riparto verso quella  
che i dise  
sia la nostra libertà.  
Si certo no semo seradi  
su come voialtri...

Ma che libertà ela questa?  
Dove nissuni te riconosce più? ..

## Giustissia?

Mai nela storia ghe stà  
tempo più ingiusto!  
E mai come ancò  
che tuti i parla de giustissia!  
Ci sa mai parché?

“Mi son giusto e voi giustissia!”  
“Basta buonismi! Bisogna  
far giustissia!”  
“Se no la fa lo Stato,  
la faremo noialtri!”  
“Tuti in galera e butemo via  
la chiave!”

E podarìa sontar altri discorsi  
fati da bona gente,

e da gente ipocrita  
e che se ne frega  
ma siga all'untor  
pàr salvar la so botega...

Me fa tanta tristessa  
sentir sti discorsi  
da gente che va in ciesa  
e ogni giorno fa na lunga litania  
de tante ave maria...  
“Basta carità ghe vol giustissia!”  
Ma quando gh'è stada carità?

Anca mi credo a la giustissia  
ma prima che su i altri  
la devo fàr passar su mi.

E mi,  
fasso giustissia vera?  
So dividàr el mal  
da ci lo fa,  
e forse non sa gnanca lu parché?

Poro Gesù  
te pareva  
d'aver parlà ciaro  
su quel monte in Galilea...  
Ma ala nostra gente  
che te sta devota  
ghe fa più comodo  
pregarte su l'altar  
che netar le ferite  
de ci l'è bastonà...

# Ricorda Israele...

*“Ricorda fiol de Israele  
che anca ti te si sta pelegrin  
nela tera d’Egito...”  
Così la parola de Dio!*

*“Ma che i staga a casa sua!  
Sa vienli a far qua?  
a rubar e far del mal  
a le nostre fiole!”*

*Così la parola de l’omo  
del dumila!*

*“Ricorda fiol de Israele  
da tegnàr riguardà l’orfano,  
la vedova e el pelegrin foresto...”  
Così la parola de Dio!  
“Ma lassa stàr mi sto a casa mia,  
vo a messa, digo le orassioni,*

*fo anca le offerte a le missioni,  
ma, scusa la parola,  
no voi roture de cojoni!”  
Così la parola de l’omo  
del dumila!*

*Cossa dir? Fasso silenssio  
La colpa l’è anca mia...*

## A l'Omo de la sindone

Nela me zoventù  
me piasea lesar  
e amavo no scrittor ruso  
che disea che se dovesse stàr  
o con Cristo o con la verità  
lu starìa più con Cristo  
che con la verità...  
G'ò fato sto pensier  
in sti giorni che a Torin  
i mostra n' lensol  
che gà strucà  
n' corpo morto  
che g'à soferto in vita...

Mi no me fo complessi  
E no me curo de ragionamenti,  
se sì, se no, se forse che sia...

Mi prego quel lensol,  
sia come sia  
so che l'à strucà un poro omo,  
martorià, copà dai potenti  
d'ogni tempo e d'ogni età,  
che col sangue g'à lassado  
el segno  
segno che nessun odio,  
mai scancelerà!

Sia come sia  
pàr mi quel omo l'è Cristo!  
Discutè pure sciensiati  
e monsignori  
parleve dosso dentro le tivu...  
Ma pàr mi dentro quel lensol  
ghe sta solo  
el so corpo tribulà...

Quel corpo che no savì trovàr!  
Quel Gesù che l'è risussità  
pàr fàr scapàr ci crede che la so  
verità vegna prima dela fede!